

DARRÉU



“10 años de llucha, 10 años tresformando Asturias”

2004 - 2014

Documentu políticu del V Conceyu Nacional de Darréu (Avientu 2014)

Tres el IV Congresu Nacional cèlebráu en setiembre de 2013, dende la Moceda d'Izquierda Soberanista afróntase una nueva cita na que seguir afondando na definición ideolóxica, política, organizativa y estratéxico-táutica de la nuesa organización, nun momentu nel que la situación de gravedá que vive'l Pueblu Trabayador Asturianu requier de seguir dando pasos alantre nel camín de la movilización y la tresformación.

Col envís de dar una posición xeneral alrodiu los principales camientos y determinos desendolcaos nesti V Conceyu Nacional, dende Darréu ufrimos el viniente documentu, compuestu por delles estayes d'analís y decisión aprobaos pola militancia de la nuesa organización xuvenil, que sigue trabayando pa construyir un referente políticu y social pa la moceda asturiano qu'afonde na dinamización y concienciación de la cuestión social, nacional y de xéneru, dientru la moceda y defendendo los drechos coleutivos y la dignidá d'ésta.

ÍNDIZ

1. Realidá sociopolítica d'anguaño n' Asturias.....	3
1.1.Llaboral	3
1.2.Social.....	4
1.3.Cultural y Llingüística	6
1.4.Muyer.....	7
1.5.Mocedá – Estudiantil	9
1.6.Político– Sindical	12
1.7.Institucional (Principáu y Monarquía).....	14
1.8.Ecoloxismu.....	15
2. Darréu dende 2004.....	16
3. Darréu en 2014.....	17
4. Llazos vieyos, llazos nuevos	21
5. Camín a seguir	24
6. Internacionalismu	25
7. Pieslle	27

1. REALIDAD SOCIOPOLÍTICA D'ANGUAÑO N'ASTURIES

1.1 LLABORAL

La realidá llaboral del nuesu país anguaño ye la hestoria d'una constante regresión, carauterizada tanto por una perda continua d'oportunidaes de trabayu, como de la calidá d'estes. Asina, les socesives reformes llaborales desendolcaes en rempuesta a les demandes oligárquiques dende'l gobiernu español tanto pol PSOE como pol PP, vienen faciendo que la clas obrera asturiana esperimente notables pasos atrás nos sos drechos, con una constante temporalización y precarización del mercáu llaboral.

Amás d'ello, hai qu'agüeyar que'l procesu de desmantelamientu industrial, en marcha dende la mal llamada "reconversión", nun tuvo entá final, perdiendo añu a añu puxu industrial col pieslle de factoríes, retayos de plantiyes, etc. Esti fechu vien provocando tamién un seliquín pero constante cambiu nel panorama económicu asturianu frutu de la cada vegada mayor importancia del seutor servicios, terciarizándose polo tanto un númberu creciente de puestos de trabayu, que carautericense por problemátiques como la so gran estacionalización, temporalidá. y precariedá.

En cuantes al desemplegu, en 2013 algamó'l so cumal, con más de 125.000 persones paraes según la EPA, cifra que foi amenorgando dende entós hasta les cerca 100.000 qu'anguaño s'alcuentren nesa situación. Sicasí, hai que recordar qu'Asturies cuenta con unes 340.000 persones afiliaes a la Seguridá Social, con una tasa d'ocupación y de población activo a la cola del Estáu español, y menguando. La situación ye polo tanto bien complicada nesti tarrén, algamando seños d'emergencia pa más de la metá de la población parao, que yá nun percibe prestación nin ayuda económica de nengún tipu.

Yá entrando na situación concreta de la mocedá, ésta ye sensiblemente pior que la xeneral, dao que'l panorama pa la xuventú carauterízase por casi nenguna oportunidá llaboral, y la gran mayoría de toes elles precaries y temporales. Esti fechu vémoslu bien claru con unos porcentaxes de más del 90% de temporalidá nos nuevos contratos firmaos nos caberos años, o nes casi 10.000 persones (alrodiu'l 10% del desempleu total) qu'engloben el colektivu de persones paraes ensin emplegu anterior. Amás, el

paru xuvenil supera ampliamente dende va años el 50%, tando xeneralmente perriba la media estatal.

Too esto provoca que, ante la falta de perspeutives llaborales que propicien les condiciones necesaries pa desendolcar una vida digna n'Asturies, la emigración xuvenil n'Asturies tea a la tiesta del Estáu, suponiendo'l 5% del total estatal, cuando la moceda asturiano namái representa'l 2% de tola esistente nel Estáu español.

Tampoco podemos escaecer dos componentes más, recoyíos en tolo anterior pero que nos paez afayaízo destacar per separtao:

- El de xéneru, con unes muyeres que non solo sufren más el desemplegu, sinon que polo xeneral namái algamen acceder a puestos de trabayu con un perfil enforma precario y temporal, tamién perriba la media nel sentíu negativu nesta cuestión.
- El de clase, con especial enfotu na la explotación salarial, y ye que anque reivindicamos trabayu dignu nel nuesu país, ésti nun se da n'abstractu, y somos conscientes de que nel capitalismu, cualquier puestu de trabayu asalariáu, por grandes condiciones que traiga, conlleva explotación. Ye la plusvalía ún de los elementos básicos del furrulamientu d'esti sistema, y la clave del arriquecimentu de la clase dominante, polo que nun nos conformamos con una situación llaboral digna nesti sistema, sinon qu'aspiramos a superalu a él y a les sos formes d'explotación y opresión.

1.2 SOCIAL

Socialmente nun ye meyor la situación d'Asturies, tamién carauterizada pola regresión constante. Como amuesa, la falta d'afechu d'ingresos n'alrodiu 50.000 de les cerca de 100.000 persones presentes nes llistes del desemplegu, o'l 14,1% de la población asturiano en riesgo de probitú, según los datos del INE.

Ye un fechu la perda de poder adquisitivu de les clases populares asturianas, asina como l'empioramientu de les sos condiciones de vida pola perda d'ingresos económicos, pola violación de drechos básicos como la vivienda, o pol abusu oligárquicu en seutores como l'enerxéticu, onde pesie a qu'Asturies ye escedentario en producción, permítese que miles de persones s'alcuentren en situación de probitú enerxéticu, o qu'empreses abandones la so producción pol preciu la lletricidá impuestu dende'l gobiernu central, too ello pal beneficiu de multinaciones como HC Energía, Endesa o Gas Natural.

Pero l'empioramientu de condiciones de vida nun afeuta namái a la cuestión de les prestaciones o ayudes sociales, sinon tamién a otros aspeutos como la propia calidá de los servicios públicos. Asina, vemos retayos constantes n'estayes como los servicios apurríos polos conceyos, la sanidá, o la educación, onde vemos una mengua constante de places qu'afeuta de forma perespecial, tanto en númberu como en calidá, al profesoráu interín, y ello repercute non namái nel propiu personal d'estos servicios públicos, sinon tamién nel pueblu que-y da usu.

Avances sociales como l'albuertu, o una llei de dependencia siempre escasa y desendolcada tímidamente y durante pocu tiempu, vense tamién amenzaos col so desmantelamientu, amestando otra regresión social más que, nestos casos concretos, tien especial repercusión nes muyeres, otra vegada más sufriendo opresiones adicionales pol so xéneru.

Poru, vemos cómo va esbarrumbando lo que quedaba d'esa mentira llamada "Estáu del bientar", falsu consensu interclasista desendolcáu principalmente nos centros imperialistes, y bien financiáu pola esplotación del mundu subdesarrolláu derivada d'esti imperialismu yá citáu. Les élites dominantes nun van a conceder nin regalar nenguna conquista social que nun algamemos o defendamos mediante l'aición y organización popular, y como bona preba d'ello tenemos estos ataques a les cobertories sociales de diversu calter.

1.3 CULTURAL-LLINGÜÍSTICA

En cuantes a la cultura y a la llingüa asturiana, l'analís que podemos facer ye que tovía nun hubo nenguna Alministración que fixere un trabayu de fomentu y normalización tanto de la cultura propia d'Asturies como de les sos llingües. Llevamos décadas de Gobiernos sucursalistes que namás miren pa lo propio de forma folclórica y con polítiques de "medio caltenelo" comu reclamu exóticu pal turismu, pero ensin nengún tipu de normalización y relegao la mayoría de les vegaes namái al ámbitu rural, como dalgo del pasáu y ensin utilidá pal presente. Nesi sen vemos cómo les Alministraciones públiques sofiten, promocionen ya inclusu organicen cada vegada con menos mieu "Feries d'Abril" en decenes de ciudaes, viles y pueblos d'Asturies, y fomenten les corries de toros o alcuentros de calter españolista, ensin amosar nengún tipu d'arguyu nin respetu hacia la cultura propia del pueblu asturianu.

Ye por ello que ya se dan munches asociaciones y coleutivos qu'al traviés d'iniciatives populares y particulares lleven a cabu actividaes, alcuentros y eventos pa la dignificación, normalización, amuesa y defensa de la cultura asturiana, asina como de les sos llingües, la asturiana y la fala del Eo-Navia.

Nesi sen, dende Darréu vemos pernecesariu el trabayu d'estes Asociaciones y xente que trabaya en pro de la cultura y les llingües d'Asturies. Si l'Alministración nun fai esi trabayu sedrá'l pueblu el que tien que garrar la iniciativa, organizase, xunise y crear proyeutos pa dignificar, normalizar y trabayar en pro de la cultura del pueblu asturianu. Amás d'ello, nun se pue escaecer qu'esi trabayu tien que complementase siempre con nun dexar de criticar les polítiques culturales que les Alministraciones lleven a cabu y el pocu enfotu de la clase política asturina por sofitar la cultura propia.

En cuantes a la situación específica no llingüístico, pocos avances fonderos vienen esperimentándose nos caberos años, onde más vien güeyamos una regresión sele pero constante. Los ataques mediáticos escontra la normalización toponímica, les torgues pal estudiu de les llingües propies d'Asturies nes escueles ya institutos, la mengua del presupuestu destináu a l'Academia de la Llingua Asturiana o los Servicios de Normalización Llingüística, asina como'l descensu constante de los fondos destinaos a la espublización de lliteratura o conteníu n'asturianu nos medios -sovenciones estes

últimes de les que davezu los principales beneficiaos son los grandes atacantes mediáticos d'una verdadera normalización llingüística-, amuesen la situación bien precaria na que nos alcontramos nesta cuestión. La llingua asturiana y l'leonaviego, como elementos perimportantes de la cultura popular nacional d'Asturies, cunten como'l restu d'ella con un innegable componente desalienador, qu'evidentemente dende'l poder actual nun convién espertar.

Toa esta situación no cultural y llingüístico nun espeya más que la naturaleza del Estáu español: la uniformización cultural pa la construcción fallía d'un estáu-nación que, pesie a la so evidente plurinacionalidá, dende les élites enfótense en seguir negándola. El so calter imperialista afítase dende la so propia ñacencia, non como una realidá “pre-establecía” que posteriormente toma la forma d'Estáu, sinon como un ente artificial ñacíu dende arriba y empobináu al sometimientu políticu, económicu, cultural y militar de los pueblos pal beneficiu d'unes élites oligárquiques –tanto estatales como supraestatales- que por supuestu entá caltienen la so posición de privilexu, bien abellugaes nes sos ferramientes de poder.

1.4 MUJER

Si bien dende va años les muyeres llevamos algamaos una serie de drechos y conquistes, cierto ye que tovía queden muchos otros por algamar.

Les muyeres asturianas atopámonos nuna situación de crisis permanente, siendo esplotaes como muyeres, como asturianas y como clas trabayaora. Nun mercáu llaboral con considerables índices de precariedá, les muyeres vémonos llimitaes a trabayos de menor responsabilidá, mayor inestabilidá y pior remuneración. Encuestes recientes afirmen que los homes cobren n'Asturies un 23% más que les muyeres, una diferencia qu'algama'l 29,6% si tienen contratu indefiníu y hasta'l 45,3% si se trata d'ocupaciones menos cualificaes. Nel ámbitu rural, esta desigualdá vese tovía más acentuada. Al habitual trabayu domésticu súmase'l trabayu n'agricultura y la ganadería, lleváu a cabu ensin remuneración dalguna. Amás, nesti ámbitu la propia xeografía dificulta l'accesu a les oportunidaes llaborales o de formación. De la mesma manera, la inesistencia d'oportunidaes, dificulta l'accesu de les muyeres al mercáu llaboral, como puede ser la

falta d'escuelas infantiles onde dexar a los neños nel periodu ente que fina'l permisu por nacencia y entamen al colexu.

Nesti contestu vemos como resultáu la emigración non sólo a les ciudaes, dando llugar a la despoblación del mediu rural, sinon la emigración forciada fuera d'Asturies, onde nun ye raro que les muyeres véanse obligaes a aceptar trabayos precarios y mal remuneraos.

Pero la situación de les muyeres nun se llimita namái al ámbitu llaboral. Hai que tener mui en cuenta la so situación en casa, onde la violencia machista nun fai otra cosa que dir n'aumentu. Nel segundu trimestre de 2014, Asturias rexistró un total de 634 denuncies por motivos rellacionaos cola violencia machista, situándose así octava na llista de comunidaes con mayor númeru de denuncies presentaes. Ante esta situación, el llíder “socialista” Pedro Sánchez, ufierta funerales d'Estáu a les víctimes de la violencia de xéneru. Dende Darréu, consideramos llamentables les declaraciones d'esti políticu y dexamos claro que nun queremos funerales d'Estáu, porque direutamente nun queremos víctimes de la violencia de xéneru.

Otru ámbitu mui polémicu n'actualidá ye'l del drechu a decidir de les propies muyeres. Recientemente, la dignidá de les mismes viose afeutada pola reforma de la llei de albuertu de Gallardón. Esta llei pretendía facer de les muyeres un meru oxetu llexislable, prohibiéndonos el drechu a decidir sobre'l nuesu cuerpu. Finalmente, el resultáu foi la suspensión de la llei y la dimisión del ministru Gallardón.

Dende la Moceda d'Izquierda Soberanista, valoramos esta victoria como un avance perimportante na llucha polos drechos de la muyer, pero nun dexa de ser un simple pasu. La llucha ha de siguir hasta'l fin del patriarcáu, pilar básicu del sistema capitalista, y del Estáu Español, ferramienta que los sustenta.

En cuantes al papel del feminismu dientro de la Moceda d'Izquierda Soberanista, dende Darréu apostamos por siguir avanzando nesta cuestión col entamu d'espacios de trabayu específicos alrodiu feminismu, que permitan non sólo continuar enxertándolu con mayor eficacia na dinámica de la organización, sinon tamién

desarrollando un discursu de xéneru dende la perspeutiva asturiana, soberanista y de clase.

Les muyeres asturianas vamos siguir lluchando pol nuesu drechu a decidir; por un trabayu digne y con igual salariu y condiciones; por una educación pública, llaica y non sexista; por una sanidá pública qu'atienda les nueses necesidaes, pola fin de toa agresión o práutica sexista, etc. Les muyeres asturianas vamos siguir lluchando por una Asturias feminista, socialista y soberana.

1.5 MOCEDÁ-ESTUDIANTIL

Si fai diez años la emigración forciada yera ún de los principales problemes, güei ye probablemente el mayor de l'ellos. Anguaño son milenta les families que cunten con dalgún miembru mozu emigráu fuera d'Asturies y resaltar que, agora el destín ya nun ye namái Madrid o Barcelona, sinon que son Londres, Berlin o Bruseles algunos de los sitios onde milenta moces y mozos colen a la gueta d'un futuru llaboral digne. En munchos de los casos nun ye namái el fechu de tener qu'emigrar, sinon les condiciones precaries que tamién alcuentren nesos destinos, onde sí qu'atopen trabayu, pero la mayoría en condiciones precaries ensin malpenes capacidá d'aforrar y trabayando pa ganar lo xusto pa sobrevivir. Siendo asina la emigración forciada la gran problemática de la mocedá asturiano anguaño, consideramos que debe ser una cuestión de permanente oxetu d'axitación y propaganda pa la Mocedá d'Izquierda Soberanista.

[Más info sobre la cuestión nel manifiestu contra la emigración forciada:

<https://docs.google.com/file/d/0BwwPTuQro4gbekZzRmFqS1VVVVk/edit?pli=1>]

Otru problema pergrave ye la brutal despoblación del mediu rural y de les fasteres orientales y occidentales d'Asturies. Les polítiques de la FSA, PP, IU, UPyD o Foro, nun faen más que satisfacer los ideales del capitalismu más xabaz aplicando polítiques que directamente impiden cualesquier futuru nes zones rurales d'Asturies. Pueblos avieyaos, ensin mocedá y ensin guah.es, son la semeya que se pue ver na mayoría de les collaciones d'Asturies. La globalización ta siendo una realidá cada vez más palpable que dexa fuera de xuegu el futuru fuera de les ciudaes y villes de la zona centro d'Asturies, too ello bien empobinao por polítiques esternes como la PAC.

Emigración forciada y despoblación rural tan faciendo qu'el nuesu pueblu tea sufriendo una brutal crisis demográfica onde la pirámide demográfica de población camina haza un formatu totalmente invertíu. Nesi sen, ye perimportante recordar qu'el futuru de los pueblos ta na fuercia de la so mocedá y con polítiques y práctiques como les que se lleven mediu sieglu practicando n'Asturies, el futuru de la mocedá y del pueblu Asturianu vese nun seriu peligrosu.

Faen falta polítiques y midíes urxentes de mocedá y de sofitu a la natalidá. Los pueblos ensin guah.es y ensin mocedá carecen de futuru, polo qu'estes midíes tienen que s'aplicar na mayor brevedá posible, y la mocedá tien que ser consciente de que somos nós les que tenemos qu'esixir esti cambiu y facer por ello.

Nesa llinia, queremos sollinñar que, pesie a que nos paezca vergoñosu l'inmovilismu total del gobiernu asturianu y de los conceyos pa con esta problemática, nun asperábemos otra cosa. Como bonos títeres sucursalistes del poder central, y ésti a su vez de les oligarquías económiques qu'empleguen l'Estáu español como una de les sos principales ferramientes de dominación y explotación, llimítense a aplicar -o nun aplicar- aquello que convenga a unos intereses económicos concretos, que nun son precisamente'l bien del pueblu trabayador asturianu y, nesti casu concretu, de la so mocedá.

La división territorial de la explotación económica nel Estáu español fae que se desendolquen distintes formes de materializar el colonialismu interior, faciendo evolucionar a Asturies en distintes direiciones según convenga. Mientres va años Asturies yera un centru d'explotación industrial especializáu -bayurosa producción de fierro y aceru semitresformao, ya industries rellacionaes/derivaes- o d'extraición de recursos naturales como'l carbón, esti papel amenorgó enforma, o incluso diversificóse n'escala menor haza otros recursos como l'oru. Sicasí, tomen especial importancia otres formes d'explotación, como la producción llétrica escedentaria, l'enfoque d'Asturies como parque temáticu turísticu, o la esportación de mano d'obra, principalmente cualificao pero tamién d'otra triba.

Nel ámbitu estudiantil la mocedá sigue sufriendo la mesma represión llingüística que va 10 años. La especialidá de llingua sigue ensin tar reconocida, el profesoraú sigue

siendo ún de los seutores más precarizaos de l'enseñu dientro de l'Estáu español, la enseñanza privao-concertao sigue esquivando y atapeciendo l'asignatura de llingua, les estudiantes asturianofalantes siguen siendo menospreciaos y en munchos casos ridiculizaos, etc. Ye constante el deterioriu de la llingua asturiana nel enseñu y el modelu educativu n'Asturies sigue ensin espeyar la realidá sociocultural del nuesu pueblu. Nesi sen vemos pernecesario que tanto los sindicatos de l'enseñu como los estudiantes, profesores y más y pás, esixan un modelu educativu fechu acordies a les realidaes del pueblu asturianu onde s'entame un procesu dende les etapes más básiques d'inmersión llingüística n'asturianu. La nuesa llingua tien de ser l'idioma vehicular nel enseñu, pero pa entamar esti procesu ye necesario que les docentes y pedagogues tengan una formación en llingua adecuada pa desendolcar el procesu d'inmersión llingüística. Toes estes cuestiones nun faen más que facer ver lo grande que tien que ser el cambiu nel modelu educativu y la tresformación social que fai falta en tola cadarma educatiuva asturiana. Esti análisis ye tanto pal asturianu como pa la fala o eonaviego.

En cuantes a la situación xeneral del sistema educativu, tornamos a insistir nos notables retayos na educación pública desendolcaos tanto pol gobiernu central, como pol gobiernu asturianu al traviés de la Conseyería d'Educación. Asina los vienen denunciando sindicatos educativos, qu'espliquen que la Conseyera ta retayando incluso perriba lo esixío dende'l gobiernu español. Esto tórnase en piores condiciones nes aules, en retayos de profesoráu, piores condiciones pal personal interín, y en xeneral, una pior calidá na enseñanza.

Na Universidá nun ye mejor la situación, con recortes de servicios, aules ensin calefacción, menos beques y de menores cantidaes, xubíes de tases, l'aplicación d'un polémicu ya inxustu reglamentu de permanencia, etc.

Per otru lláu, dende Darréu vemos perimportante l'apaición nes aules d'Asturies de la Xunta Estudiantil Asturiana. La rellación ente ambes organizaciones ye non solo perbona, sinon tamién imprescindible al ser les principales ferramientes organizaes del soberanismu nel ámbitu de la mocedá.

Ye la XEA la organización estudiantil d'Asturies referente pa la mocedá soberanista que llucha por reivindicar y algamar solución pa toes estes cuestiones enriba

mencionaes, asina como toles otres empobinaes a una educación popular, igualitaria, emancipadora, y asturiana. Dende Darréu consideramos que la XEA ye una parte más perimportante de la cadarma qu'el soberanismu d'izquierdes tien que construyir, asina como una organización que, pesie al so entá rellativamente curtiu recorriú, tien qu'aspirar a ser una de les ferramientes principales que permitan la organización y movilización del estudiantáu asturianu al marxe de dinámiques españolistes, desmovilizadores y con discursu reformista d'organizaciones como'l Sindicato de Estudiantes.

1.6 POLÍTICO-SINDICAL

La situación política d'Asturies vien sufriendo dellos cambios de formes nos caberos años, aunque non enforma nel fondu. La FSA-PSOE y los sos apéndices en tarrenes como'l sindical (SOMA-UGT) perdieron nos caberos años parte del so poder clientelar, aunque siguen calteniendo un perimportante texú d'amiguismu, vasallaxe, y otres formes de corrupción que, pasín a pasu, paez que van asoleyándose públicamente con pruebas, aunque nun dexen de ser secretos a voces.

IU caltuvo nel arecismu'l so sofitu, a vegaes per aición y otres per omisión, a tou esti entramáu, aunque na cabera llexislatura los alcuerdos y sofitos al gobiernu de Javier Fernández foron más tímidos y discretos, nun primer tramu de gobiernu onde la FSA-PSOE cuntó col sofitu na investidura d'IU y UPyD. Esto últimos tamién vienen distanciándose d'estos sofitos iniciales, carauterizaos por un discursu y propuestas bien coherentes col so centralismu, nacionalismu español, ya interclasismu.

Pela so parte, la tradicionalmente considerada como "derecha" dividióse nos caberos años en dos, cola apaición de FAC énte un PP hexemónicu nel pasáu dientro d'esi espaciu. Sicasí, dambes formaciones amuesen que la razón de la so esistencia separtada, más qu'en grandes diferencies ideolóxiques, alcuéntrase en griesques de families y cuentas pendientes.

No tocante a los conceyos, l'apaición de formaciones como FAC frayó en dellos conceyos les mayoríes implícites o explícites esistentes ente PSOE y PP, apurriendo un tarrén propiciu pa la inestabilidá o incertidume propia de los gobiernos con mayoríes

simples. Esta situación afeuta a conceyos perimportantes como Xixón o Uviéu, onde vimos cómo los caberos presupuestos salieron alantre gracias a una pautada abstención d'IU.

Poru, vemos cómo'l poder políticu que lleva remanando Asturias dende la "transición", sigue col so estatus hexemónicu, pesie a dellos cambios de cares, sigles, o puestos de gobiernu. El sucursalismu y la sumisión d'una mui feble autonomía asturiana tán bien garantizaos col actual orde políticu esistente nel nuesu país.

Al marxe d'esi orde políticu nun puede quedar el sindical, onde n' Asturias venimos de décadas d'hexemonía dafechu del SOMA-UGT y de CCOO, n' Asturias en xeneral y coles cuenques mineres como máxima espresión del caciquismu desarrolláu por estos sindicatos institucionalizaos.

La so complicidá pa col poder políticu y económicu a la hora de dismantelar empreses, firmar despidos, criminalizar a toa voz disidente, o pal repartu corruptu de fondos como los mineros, ye un secretu a voces n' Asturias, secretu que vien espeyándose con datos nos caberos meses, frutu de delles operaciones xudiciales qu'afeuten a grandes cabezaleros como Fernández Villa.

Frente a esti "caciquismu sindical" atopamos a sindicatos alternativos, comprometíos cola clase obrera y alloñaos d'esti tipu d'actividaes mafioses, siendo'l referente d'ellos la Corriente Sindical d'Izquierda. Esta organización vien algamando una importancia creciente, hasta'l puntu de convertise nuna de les principales ferramientes de defensa efeutiva de la clase obrera asturiana anguaño.

Tamién derivao d'esta actividá sindical honesta, con conciencia de clase y asamblearia, surdieron les Asamblees de Trabayadores en Llucha, una bona espresión d'organización obrera dende'l marcu específicu asturianu pa la defensa de los drechos de la clas obrera con un formatu que fraya la hexemonía caciquil de SOMA-UGT y CCOO.

Son, polo tanto, éstes les dos vertientes de referencia pa Darréu na estaya sindical, a la qu'habría qu'amestar el coleutivu de Paraes y Precaries d' Asturias nel

ámbito del desempleu y la precariedá. Refugamos dafechu a los sindicatos anguaño mayoritarios como estructures dafechamente podres y non tresformables dende dientro. Toca, polo tanto, seguir construyendo y fortaleciendo les ferramientes efeutives de defensa y confrontación de la clas obrera del nuesu país, complementándose asina un llabor sindical estudiantil de mocedá cola defensa de los nuegos drechos como moces y mozos de la clas obrera.

1.7 INSTITUCIONAL (PRINCIPÁU - MONARQUÍA)

Nel tarrén institucional vemos perinteresante'l descréitu creciente y continuáu que vien teniendo la monarquía española, perimportante n'Asturies al apurrinos esa institución de "Principado" qu'espeya tan bien el somorguiamientu d'Asturies.

Nos caberos años les protestes escontra los Premios Príncipe vienen algamando una participación n'espoxigue, asina como un cuestionamientu cada vegada mayor del so papel. Nesi sen, queremos rememrar tamién que les primeres manifestaciones y concentraciones desendolcaes escontra estos premios, tuvieron entamaos pola plataforma soberanista Ensame República Asturiana, fechu valoratible qu'amuesa'l trabayu perimportante, y mui poco reconocíu, de la esquierda soberanista nesta cuestión.

Dende Darréu venimos apostando pol trabayu en favor d'un procesu constituyente asturianu que permita una rotura democrática, frayar con tolos llazos que mos aten a les opresiones, dominaciones y carencies propies del réxime del 78 nel Estáu español. Y como oxetivu cimero, l'avance na construcción d'una República Socialista Asturiana qu'entendemos como'l pasu necesariu pa poder dar acabu a toa forma d'esplotación y opresión.

Asina, la mocedá soberanista ve nesta cuestión ún de los tarrenes onde'l nuesu movimientu tien que seguir trabayando dende una visión a comuña dende, pa y por Asturies, pero ensin escaecer les aiciones y rellaciones estratéxiques, que vía l'internacionalismu de clase, permita l'aición conxunta col soberanismu tresformador del restu l'Estáu col envís de frayar l'Estáu español y propiciar los respetivos procesos constituyentes nes nueses naciones.

Pa una información más fonda alrodiu d'esta cuestión, empobinamos a la resolución política énte l'abdicación de Juan Carlos I: <http://mecedarevolucionario.blogspot.com.es/2014/06/resolucion-politica-ente-labdicacion-de.html>

1.8 ECOLOXISMU

Asturies lleva décadas siendo vendía cola marca "Paraíso Natural", pero esa etiqueta choca cola murnia realidá de l'esfarrape mediuambiental que ta sufriendo. El nuesu mediu ñatural lleva décadas siendo españáu al traviés de mines a cielu abiertu al serviciu de multinacionales estranxeres qu'espolien los nuegos recursos, llevando los beneficios y dexándonos furacos sometíos a una brutal contaminación, impactu mediuambiental, paisaxísticu y con consecuencias negatives tanto pa la salú humano comu pa la conservación y protección de la biodiversidá d'Asturies.

Mines a cielu abiertu, escombreres xigantesques, mega-puertos como'l Musel, la regasificadora, proyectos de más banzaos, o una incineradora de basories nel centru d'Asturies, más parques eólicos, contaminación y vertíos ensin control... Más qu'ún paraísu natural paez un paraísu pa la especulación enerxética y onde contaminar y esfarrapar el mediuambiente sal mui barato.

Asina, vemos qu'en llugares como Avilés, Llugones o Llangréu, l'aire rexistra los niveles de contaminación más altos del Estáu español, fechu que se suma a los vertíos práuticamente impunes d'empresas como HC Energía, Asturiana de Zinc, etc, o una política mediuambiental xeneral qu'amuesa tar non al serviciu de los intereses del pueblu trabayador y la defensa de la so natura, sinon d'intereses mercantiles, tanto industriales como turísticos.

Nesi sen, otra cuestión bien clara y sangrina ye la venceyada a la producción llétrica, mayoritariamente al traviés de centrales térmiques nel nuesu país col componente percontaminante que trae consigo, mas les llinies d'alta tensión y otre instalaciones que conlleven la esportación d'un recursu nel qu'Asturies ye productor escedentariu. Too ello namái pa un beneficiu empresarial -y de satisfacción de les necesidaes llétriques d'otros territorios mediante una rellación de colonialismu interior

empobinada pol Estáu- que n'Asturies práuticamente nun dexa nin puestos de trabayu, nin beneficiu de nengún calter pal pueblu trabayador: namái contaminación y esfarrape.

Dende Darréu consideramos qu'esti modelu mediuambiental actual nun ye almisible, pero ye'l que correspuende a esti sistema capitalista que, materializáu nel Estáu español, puxa por una división económica territorial onde Asturias ve esplotaos los sos recursos pa satisfacer intereses esternos, d'unes élites económiques. Poro, pa una tresformación real que permita un equilibriu ente'l respetu al mediu ambiente y el bientar de la clase trabayadora, ye imprescindible seguir desendolcando un discursu ecoloxista dende la perspeutiva soberanista y de clase.

2. DARRÉU DENDE 2004

Darréu nació nun constestu tanto sociopolíticu como estratéxico-táuticu bien estremáu al del añu 2014, surdiendo n'aquel momentu tres la disolución d'Andecha Mucedá por diverxencies ente la militancia respetu al camín a seguir. Una Asturias azotada pola crisis permanente de les caberes décades, pero entavía ensin amestar l'actual crisis del sistema capitalista nel Estáu español, coles sos consecuencias: mayor intensidá nel desmantelamientu industrial, medría del desemplegu, de la precariedá, espoxigue de la emigración forciada, etc.

En cuantes al propiu papel de la izquierda soberanista, yera ensin dubia Andecha Astur la organización referencial, nun momentu bien distintu, en positivu, al que vive anguaño esa organización política. Ye evidente qu'AA perdió esi papel referencial, con distintes lluches internes y discrepancies que provocaron una constante perda de militancia rumbu a otros proyeutos, o direutamente a la desmovilización.

Estos fechos afeutaron tamién a Darréu, poniendo durante un periodu de tiempu más esfuerzos y enerxíes nestes lluches internes que nuna aición efeutiva d'aición y concienciación empobinada al pueblu trabayador asturianu, asina como enfotándose en xeneral nunes dinámiques enforma zarraes y en ciertos aspectos sectaries. Too ello viose reflexao nuna mengua d'intensidá y calidá del trabayu durante dicha etapa, fechu

que sirve pa trabayar na autocrítica y deprender d'estos y otros erros desendolcaos a lo llargo 10 años.

Sicasí, consideramos que nel so periodu d'actividá, ye Darréu la organización que con mayor y meyor resultáu y constancia consiguió movilizar y axuntar a la mocedá soberanista d'Asturies, consiguiendo caltenese nel tiempu por diez años pesie a munches torgues y pilancos nel camín.

3. DARRÉU EN 2014

Dende que Darréu entamó a furrular nes cais y conceyos d'Asturies, la realidá camudó enforma, y cambió haza una situación más crítica y murnia de la sociedá asturiana como pueblu, tanto a nivel cultural, social, llaboral o llingüísticu. Nesti sen, tamién foron munchos los cambios que se dieron nel espaciu políticu nel que s'alcuentra 'l movimientu soberanista d'izquierdes. Darréu vamos enumerar brevemente cómo vemos dende la nuesa organización el panorama políticu d'aquelles organizaciones asitiaes nel espaciu clásicu del partíu, que s'enmarquen dientro del soberanismu, y destacando que lo espuestu darréu correspuende a la visión xeneral dende una militancia consciente tamién de los erros y llimitaciones de la so organización nestos diez años:

- **Andecha Astur:** organización histórica y referente demientres munchos años, a la que Darréu nutrió de militantes y cola que s'identificaba la mayoría de la mocedá soberanista. Nel 2014, y depués de munchos tumbos y decisiones poco acertaes, la dinámica organizativa y estratéxico-táutica de Darréu asítiase mui lloñe d'esta organización política,. hasta'l puntu de que na práutica va años que les rellaciones ente Darréu y AA son práuticamente inesistentes.

Esti fechu alcuentra rempuesta en varios factores:

- o Falta de rellevu xeneracional que perpetúa n'AA les vieyes zunes, estratexes, ya incluso dellos discursos que s'amosaron yá bien de veces non efeutivos pa llegar non solo a la clase trabayadora en xeneral del

nuesu país, sinon incluso tamién a aquella que yá tien un ciertu gráu de concienciación.

- Perda constante de capacidá organizativa y militante, que na mayoría de los casos tomó rumbu a otros proyeutos políticos y otre formes d'entender éstos dientro'l propiu movimientu soberanista, coles que la mocedá s'alcuentra más identificada y cómoda nel trabayu diariu.
- Falta d'apertura pa col texú militante d'Asturies: la dinámica d'Andecha Astur amuesa un calter sectariu non solamente refugando dafechu cualquier forma de trabayu seria y decidida con colectivos de fuera l'ámbitu ideolóxicu nel que nos alcontramos, sinon incluso coles propies organizaciones soberanistes. Bona amuesa d'ello ye la so posición al marxe de les dinámiques #LluchandoPolaSoberanía desendolcaes nos caberos meses, o d'espacios xunitarios como La Llegra.
- Falta d'analís y autocrítica: el discursu d'Andecha Astur nun amuesa un apueste pol analís concretu de cada momentu y situació, sinon que s'enfota una y otra vegada nos mesmos métodos ensin analizar la so utilidá y efeutividá. Una seña d'ello ye la so presencia indiscriminada en tou procesu eleutoral independientemente de les condiciones concretes de caún d'elles, centrando munches vegaes la so actividá de cai casi qu'esclusivamente nos periodos eleutorales, y cayendo, bien si non en posibilismos, sí nun escesivu mecanicismu eleutoralista nestes cuestiones. Amás, toos estos fechos -perda d'influencia nel movimientu soberanista, perda de militancia, desconexón nes rellaciones cola mocedá, etc- nun ficieron a AA replantegase les coses nin camudar la so forma de proceder, fechu que mos lleva a señalar una nidia falta d'autocrítica interna y, en consecuencia, tamién esterna.
- Poro, dende Darréu entendemos que nun momentu actual de rearticulación del movimientu soberanista, con dinámiques qu'amuesen una efeutiva acumulación de fuerces, asina como importantes cambeos nel sentíu de siguir construyendo los distintos pegoyos del nuesu espaciu

políticu baxo la forma-movimientu, son caduques dafechu les actuaciones y formes, o l'escesivu apegu pa cola sigla, suponiendo nel casu d'Andecha Astur más pilancos qu'otra cosa respeto a la citada rearticulación.

- Sicasí, y pesie a que venimos agüeyando estes cuestiones dende va munchu tiempu atrás, dende Darréu consideramos primordial en tou esti periodu calterner una posición de responsabilidad, nun contribuyendo a una mayor desestabilización organizativa de la izquierda soberanista, buscando al mesmu tiempu l' equilibriu pa col apueste pola rearticulación, participando en distintes dinámiques de xunida y acumulación de fuerces. Sicasí, consideramos qu'esas contradicciones que vinimos asumiendo nos caberos años nun pueden caltenese por más tiempu, a la vez que vemos nel momentu actual un bon contestu pa dar un pasu consecuente colo espresao nestes llinies.

- **Compromisu Por Asturias:** Frutu principal de la xunión d'UNA y Bloque por Asturias, vemos en Compromisu un nuevu episodiu d'una fuxida p'alantre carauterizada pol enésimu cambiu de formes y non de contenú, por varies cuestiones:

- Discursu ambiguu en dellos finxos que dende la Moceda d'Izquierda Soberanista consideramos primordiales, abrazando la retórica ciudadanista y un escesivu enfotu -heredáu- en plantegar la so actividá con vistes a procesos eleutorales, en llugar d'apostar primordialmente pol encadarmamientu popular de base que vemos imprescindible y prioritariu nesti momentu, asina como n'aspeutos formativos y de potenciación y concreción ideolóxica en cualquier otru sen.
- Escesiva hostilidá pa cola crítica y l'autocrítica: como meyor amuesa, esa mesma fuxida p'alantre, que podemos exemplificar de forma más concreta nún de los sos integrantes, el Bloque por Asturias: ésti anguaño sigue defendiendo y considerando positiva la so etapa de participación

nos nefastos gobiernos de la FSA-PSOE d'Areces, sofitaos por IU-BA-LV.

- Abrazu de proyeutos contradictorios pa colos finxos ideolóxicos del soberanismu: dende Darréu nun alcontramos xustificación convincente pa laparticipación de la izquierda soberanista nun espaciu como Podemos, onde nin se cunta con fuercia pa condicionar, nin nos paez asumible ideolóxicamente como espaciu nel que participar, ya que pesie a la retórica "anovadora" na que tanto insisten, vemos reflexaes claramente les vieyes zunes de la izquierda españolista.
 - Nesi sen, de momento en Podemos nun vemos más qu'otra oportunidá perdía de la izquierda española pa desendolcar un discursu coherente y consecuente no tocante a la cuestión nacional: de nada sirve reflexar por escrito'l respetu del drechu d'autodetermín o del federalismu, si na práctica nun se realiza la consecuente actividá desalienadora y de creación de conciencia nacional nos respetivos territorios, o nun se destierren del vocabulariu conceutos como "pueblo español" o "región". En definitiva, paez más de lo mesmo de siempre: un discursu más avanzáu no nacional n'aquelles naciones onde'l discursu soberanista ye hexemónicu o mui fuerte, y residual n'aquelles naciones nes que l'españolismu domina.
 - Amás, la forma organizativa interna espeya una vocación centraliega bien definía y poco asumible, y acompaña, como suel toa espresión d'españolismu, por unos plantegamientos más averaos a posiciones reformistes que tresformadores, too ello dende'l puntu vista de los nuegos finxos tanto ideolóxicos como estratéxicos.
- **Conceyu Abiertu:** anguaño trátase de la organizacion cola que mayores llazos y sintonía atopamos, identificando como positives les práutiques de trabayu conceyil dende la base como xera importante p'algamar la tresformación social

del nuesu pueblu mediante la xunidá popular, asina como'l decidíu apueste por dinámiques como #LluchandoPolaSoberanía.

Pesie a ello, échase en falta una mayor actividá y constancia d'esta plataforma municipalista, anque nun ye fácil, debío a la cantidá de cambios políticos que se tan dando güei n'Asturies y a la velocidá que se dan, amás del propiu contestu del nuesu movimientu que, probablemente, fae de Conceyu Abiertu un proyeutu con munches posibilidaes de futuru, pero con innegables dificultaes globales nel presente. Dende Darréu queremos insistir, nesti sen, no positivo que supón trabayar nun contestu como'l conceyil, que favorez el trabayu de base pola unidá popular, lloñe de guerres de sigles, y apurriendo un contestu bien afayaízu pa treslladar les visiones de la mocedá soberanista, y les problemátiques xenerales de la xuventú.

- **IAS:** Organización que frayó con UNA durante'l procesu de formación de Compromisu, carauterízase nestos años por una valoratible llabor d'analís de la realidá del nuesu país, cuntando con cuadros teóricos qu'amuesen solvencia. Sicasí, nel tarrén práuticu amuesa un perimportante desapegu pa coles dinámiques que desendolca anguaño la izquierda soberanista, con una actividá práutica inesistente a esti respeuto, y bien llimitada en xeneral.

4. LLAZOS VIEYOS, LLAZOS NUEVOS

Con esti contestu analizáu, dende Darréu vemos que non solo ye necesario, sinon tamién inevitable, que dende la nuesa organización demos los pasos afayaízos que contribuyan al procesu de rearticulación de la izquierda soberanista.

Dende un puntu de vista de mocedá, vemos imprescindible la construcción d'un referente de mocedá que tola izquierda soberanista sienta como suyu, y que complemente asina esi mesmu rol cumplíu na estaya estudiantil pola XEA. La realidá ye que nes actuales circunstancies, pesie a que como yá se desplicó enantes, los venceyos

formales con otras organizaciones son inesistentes na práctica, dichos venceyos formales suponen una torga nel procesu.

Nin renegamos nin refugamos los llazos calteníos a lo llargo d'esta década, considerándolos los más afayaízos dientru d'una etapa determinada del nuesu movimientu, y faciendo autocrítica interna pa deprender d'ellos. De fechu, tampoco arrenunciamos a unes rellaciones normalizaes con Andecha Astur dende la perspeutiva de dos organizaciones soberanes, pero como parte del mesmu movimientu. Sicasí, l'analís de les condiciones concretes d'anguaño dícenmos que ye momentu de dar pasos alantre y ufrir los cambeos demandaos y que consideramos imprescindibles.

Ye por ello polo que dende Darréu apostamos por un fonderu cambiú nos nuestos estatutos, qu'ente otras cuestiones, fraye'l venceyu formal de la Mocedá d'Izquierda Soberanista con Andecha Astur, convirtiéndose tamién na teoría lo que yá vien siendo una realidá na práctica: la nuesa independencia organizativa y en cualquier otra estaya que queramos considerar.

Amás, nos postreros años delles plataformes de calter sociopolíticu y de base - como por exemplu Asturias en Pie-, na que participen sindicatos, coleutivos y centros sociales colos que la nuesa militancia tien comunicación constante y bona sintonía, tan faciendo una llabor perbona, pernecesaria y perinteresante na que la nuesa militancia participa dende dientro y collabora a títulu individual na midía de lo posible, ya sía esparciendo les campañes pelos medios de comunicación o participando nes convocatories y actividaes. Nesti sen, vemos necesario poder participar nesti tipu d'espacios tamién a nivel organizativu y formar parte p'apurrrir d'un xeitu más formal y direutu los nuestos medios posibles pa qu'estes iniciatives sigan medrando, apurriendo sofitu.

Ye por ello que, nel actual contestu, entendemos que Darréu tien que ser dafechamente soberana, ensin nengún tipu de venceyu formal con nengún partíu políticu, siendo exclusivamente la organización de Mocedá d'Izquierda Soberanista referente d'Asturies. Esto va permitir ameyorar el desendolcu d'esta voluntá de trabayu ampliu con otros coleutivos ensin xenerar nengún tipu de rocea nin confusión ente les

estremaes sensibilidaes que puedan participar d'elles, frutu de los vínculos formales anguaño esistentes.

Tamién nos postreros años son dellos los Centros Sociales Autoxesionaos los que foron surdiendo n'estremaes zones d'Asturies. La militancia de Darréu tien como ún de los sos enfotos la participación en bona parte d'ellos, sofitando la xunidá d'aición popular nos pueblos y conceyos como principal ferramienta pa la tresformación social y contribuyendo na medida de lo posible nel trabayu que l'Asamblea d'estos espacios decide llevar alantre. Dende Darréu vemos perimportante participar nestos espacios onde se practiquen esperiencias de xunidá popular ya sía pa facer resonar un pensamientu críticu nos barrios, pueblos y conceyos o pa llevar a cabu una programación cultural y social nel ámbitu llocal.

El recién creáu Llar de La Llegra, ye'l centru social referente de la izquierda soberanista, nel que Darréu tien intención de participar tantu a títulu individual de la so militancia comu a títulu organizativu pa l'espoxigue del mesmu, considerando la creación d'espacios soberanistes d'esti calter como una de les claves del espoxigue dende la base d'esti movimientu nos vinientes años.

Nesi sen, dientro d'eses actividaes amplies de base, y como l'antifacismu ye ún de los pegoyos de l'ideariu políticu de Darréu, vese perimportante sofitar y participar n'aquelles iniciatives antifacistes y antirracistes -asamblees, campañaes, comités etc- que vienen surdiendo recientemente, y que puean surdir bien como rempuesta o bien como anticipación énte una problemática qu'hai qu'atayar ensin medies tintes.

Son toos estos dalgunos exemplos de les rellaciones que dende Darréu venimos texendo nesta cabera etapa, a los qu'habría sumar el sofitu al llabor de la CSI como'l nuesu referente sindical de clas d'Asturies, o de coleutivos feministes, precarios, etc.

Nesi sen, tamién vemos necesario seguir construyendo llazos n'otres estayes: sofitando'l llabor de medios contrainformativos de gran valir pa esparder mensaxe (InfoAsturies, Alderiques d'Asturies...), o'l trabayu de coleutivos enxertaos nel movimientu de reivindicación llingüística, tanto nel casu del asturianu como de la Fala o Eonaviego.

5. CAMÍN A SIGUIR

Poru, pa Darréu entama un nuevu contestu, una nueva etapa na que simplemente afitamos l'apueste pol que venimos trabayando nos caberos años: xunidá non a cualquier preciu, dende unos mínimos ideolóxicos y estratéxico-táuticos, pero tamién dende la necesaria xenerosidá requerida pa qu'esa xunidá, plantegada dende'l trabayu de cai y de base, seya una realidá.

Como bien dicimos, esti nuevu contestu yá ta en marcha na práutica dende va tiempu, anque dende una perspeutiva formal nun se dieren hasta agora dellos pasos necesarios. Y dientro d'esti procesu de rearticulación, garra especial importancia pa Darréu la construcción de rellaciones col texú de la izquierda alternativa que garra Asturias como'l so marcu d'actuación y suxetu políticu. Dende centros sociales, llucha estudiantil, iniciatives antifacistes, plataformes antirrepresives, o les propies dinámiques xunitaries de la izquierda soberanista. Son dalgunes de les estayes nes que Darréu apuesta por seguir trabayando dende la mocedá p'afitar una unidá popular pernecesaria pa poder algamar les ambiciosos tresformaciones a les qu'aspiramos.

Nesi sen y nel contestu actual, Darréu va a puxar pol afitamientu de la izquierda soberanista asturiana como un movimientu ampliu y activu compuestu por distintes plataformes, organizaciones, estructures ya iniciatives. Dientro d'esi movimientu la nueva organización quier servir como estructura que trabaye la estaya de la mocedá, tresmitiendo siempre la importancia d'entender el movimientu como un tou con estayes de trabayu distintes (forma-movimientu).

La nueva militancia sedría integrante del movimientu de la izquierda soberanista asturiana, y la inquietú de querer trabayar nel ámbitu de la mocedá fadríala participar y formar parte de Darréu. Nesi sen, produzse un cambiu nel mou d'entender la cadarma d'organización, la cual s'alloñaría de les vieyes práctiques verticales onde distintes sigles d'estremaes organizaciones se xunen mediante llazos xerárquicos, y entamar a trabayar entendiendo que Darréu ta compuesta por militantes d'un movimientu ampliu que ye la izquierda soberanista asturiana.

El pasu d'una visión con estremaes organizaciones polítiques independientes ya incluso enfrentaes, a una perspeutiva de forma-movimientu con distintes estructures organizatives compartiendo finxos y oxetivos n'estayes diverses, ye la nueva perspeutiva que la nuesa organización entiende nel contextu sociopolíticu actual, y cola esperiencia de la hestoria de toes aquelles organizaciones que se definíen dientro del espectru del soberanismu d'esquierdes. Cola formalización d'esti xiru, Darréu pretende puxar pola xunidá d'aición popular y contribuyir a l'afitamientu del movimientu de la esquierda soberanista asina como de toles estayes que la conformen.

Una bona espresión de toes estes cuestiones ye'l trabayu realizáu col Día de la Mocedá Revolucionario, qu'amás de ser por parte de Darréu ún de los sos eventos más importantes pa la reivindicación y dinamización de la mocedá, vien implicando nesta cabera edición el trabayu y participación de numerosos coleutivos y persones, nun quedando en daqué pesllao a la nuesa organización, nin nel so desendolcu, nin nos sos beneficios de distintu calter.

Sedrá, polo tanto, el trabayu de la Mocedá d'Izquierda Soberanista determinante, de cara a que'l movimientu nel so conxuntu camine haza esta visión hasta'l puntu de facela una realidá. Pa ello, entá queda distinta xera, siendo la primordial la construcción d'un referente políticu seriu, ampliu y xunitariu, pa cuya construcción la xuventú tien que puxar pol soberanismu, el socialismu y el feminismu, como los principales finxos a desendolcar por dichu referente.

6. INTERNACIONALISMU

La Mocedá d'Izquierda Soberanista entiende l'internacionalismu como un elementu imprescindible de teorización y aición, más entá na actual fase del capitalismu na que nos alcontramos: l'imperialismu. Esti estadiu carauterízase nel nuesu contestu, ente otres cuestiones, pol parasitismu económicu d'un estáu dominante qu'emplega tanto les naciones que lu componen, como otres asitiaes nes sos zones d'influyencia, col envís d'arriquecer a la so clas dirixente. Poro, entendemos l'internacionalismu como un finxu clave, puxando pola unidá de clase dende les especificadaes, ritmos y formes de llucha

propies de caúna de les naciones del mundu, y nel marcu concretu ya inmediatu nel que nos movemos, nel Estáu español,

Asina, Darréu desendolca rellaciones internacionales con distintes organizaciones d'otros países, principalmente del Estáu español. Nesí sen, son cordiales les rellaciones coles nuses organizaciones homólogos, tando enxertaos en dinámiques como "Somos vuestra peor pesadilla".

Tamién vien trabayándose con especial enfotu durante'l caberu añu l'establecimientu de rellaciones coles organizaciones de naciones celtas de fuera del Estáu español, algamándose con cierta incidencia en casos como'l de Bretaña, aunque entá con muncha xera per delante.

Sicasí, dende Darréu nun nos conformamos, y siempre na medida que lo permitan les circunstancias de la coxuntura nacional propia, aspiramos a seguir afondando nesti tipu de rellaciones y la implicación nes mesmes, entendiendo como imprescindible la solidaridá de clase de cara a algamar la soberanía de les nuses respetives naciones, pero tamién como elementu de fuerzia que contribuya a desacreditar na práutica falsos discursos internacionalistes del españolismu, qu'amuesen en verdá un universalismu abstractu propiciu pal Estáu opresor.

Tamién se ve necesario afondar nel trabayu que se vien faciendo n'estremaos comités de sofitu pa con causes internacionales, o nes actividaes de concienciación internacionalista que venimos desarrollando nos caberos años al traviés de charres y distintes actividaes, y que sirven tanto pa ufrir un golpe a comuña dende distintes realidaes nacionales, como pa deprender de toes elles.

7. PIESLLE

Con too, dende la Mocedá d'Izquierda Soberanista enfotámonos en seguir trabayando, dende esta nueva posición dientro de la izquierda soberanista asturiana, por apurrir a la mocedá del nuesu país una alternativa dende la qu'organizase, formase y actuar pa tresformar la realidá na que nos alcontramos.

Nesi camín, vamos intentar seguir ufriendo como puntos irrenunciables unes bases ideolóxiques que busquen camudalo too dende'l raigañu, xenerosidá y enfotu a la hora de rellacionanos col restu de movimientos populares d'Asturies, y un oxetivu claru de seguir contribuyendo a la rearticulación y puxu de la que tien que ser l'alternativa sociopolítica de y pa les clases populares del nuesu país.

PUXA ASTURIES LLIBRE, SOCIALISTA Y FEMINISTA